

## Zems Agau e nugau zebigeg

Agau e Zems nug sikut weun. Dudu asiu agal dabeleu Zems go Yesus nugau amag pet. Zems go Kristen duailel Zerusalem ban uzan darem agal gumaraneu du banou. Duailel ipal ag agal oiagab Yesus en petak emen ag uhu oimai, uminaimai, emgasag gasag beu beu betei daremenin. Zems go duailel go sikut wai mareun. Go Kristen duailel ein igul naliu mabun en sikut weun.

### **Agau e sesamorabun en ze**

- 1:1 Zems nug duailel 'Amban' awareun.
- 1:2-8 Ig uhu oi amam, bo, igual oigeb selai mui daimai, igual oigeb Yesus en petak emun go gusig mai dab.
- 1:9-11 Ecesab asiu a dudu mui, dudu ecesab tamacag mui, agal ze.
- 1:12-18 Ig Satan nug bimaig piba, igul eg i mab.
- 1:19-27 Ig Uwait nugau ze gaul i duab. Ig gonugau ze doimai, sesamoraimai, salau murab.
- 2:1-13 Ag dudu ipal agal iweiu uligaimai, go dudu egeg ta, naliu ta, i awaran.
- 2:14-26 Igual oigeb Yesus en petak aimai, gaul i dab. Igual oigeb petak aimai, dudu ipal abai marabun salau naliu mab.
- 3:1-18 Ig igual minomig suban gumab.
- 4:1-5:6 Ig em e ebuan igul eg unum utab. Guzenaimai, awau dabun igul tutak sesamorab.
- 5:7-20 Ig uhu oimai, subantal gusig tapai daimai, Uwait nug aurai dab.

<sup>1</sup> O zaiar, iz Zems, Uwait mui igual Dubanou Ban, Yesus Kristus mui goagal salau du nug, ag Israel duailel emgasag beu beu bitei daremen sikut wai marem.

*Uhu wabun igul.*

<sup>2</sup> O izal zaiar, ag uhu asiu oiban, oiagab eg i umau, agal oiagab siksikai mui, damau.

<sup>3</sup> Einen, ag abiu uhu go agal oiagab Yesus en petak emen patai uligaraba, ag gusig tapai dabun umamen.

<sup>4</sup> Gonun, ag umkoskos gusig tapai dan. Go igul ag ibalagab gusig zumau, ag suban damamen. Gonun, Uwait nugau igul ag ibalagab i wagemamau. Tam pet tam, agal igul naliu banou usalaimai, Uwait nugau igul unum sesamoramamen.

<sup>5</sup> Bo, duair in ag ula go dabeleu naliu tam, go Uwait nug dabeleu naliu go murabun auraba, Uwait nugtal go muramau, einen, Uwait nug duailel agal igul i sisaramau, go duailel unum ougab siksikai mui gaul maraneu.

<sup>6</sup> Bo, go Uwait nug ein ece murabun auraimai, gonugau dabeleu aliag i mamau, go gonugau ougab petak mui eiman auramau. Duair in go dabeleu aliag mui eiman auraneu, go a ebeg wol nug pataraneu sul guzenaneu.

<sup>7-8</sup> Guzenai duair gonugau dabeleu aliag dareu, go ein igul macaneun du go gusig tapai i daneu. Gonun, go ece tub Uwait ebuan wabun i dabila-mau.

<sup>9</sup> Du in go ecesab asiu tamacag, go siksikamau, einen, Uwait nugau ameg ebu go wanib mui.

<sup>10</sup> Bo, du tub go ecesab asiu mui, Uwait nug gonugau wanib naliu go wanib gaul pet abai

muraba, go siksikamau. Einen, go a sisil sul du-liamau.

<sup>11</sup> Am banou zuba, gonugau wes a musib pataba, iwei naliu duliaimai, zilagai noimai, eg waneu. Go sul, ecesab asiu mui du han salau mai damau ziwas ebu a sisil guzenaneu sul guzenamau.

<sup>12</sup> Du in uhu tub go ebu zuba, gusig tapai daneu go siksikamau. Go uhu unum etuboroimai, Uwait nug dorog muzmuz awau dabun gusig muramau. Duair in Uwait en ougab nug noumaneu, Uwait nug ece naliu go murai aneun.

<sup>13</sup> Bo, du in igul eg mabun ougab asaimai, gonugau dabeleu, 'Uwait nug igul eg go mabun bimai peu' aimai i ze mamau. Uwait go igul eg mabun i bimaig pianeu. Tam pet tam, igul eg nug Uwait bimag piabun iborain tam. Kolital, Uwait nug du tub igul eg mabun bimag i pimau.

<sup>14</sup> Bo, ig tutak tutak igual dabeleu eg nug igul eg mabun bimaig pina, igul eg manem.

<sup>15</sup> Igul eg mabun dabeleu go ig bimaig pina, igul eg mina, igul eg go banou usalina, igual doropig noumamam.

<sup>16</sup> O izal zaiar, dudu ipal agen polumarebi, ag dabeleu eg i wan.

<sup>17</sup> Ece naliu mui, igul naliu unum wanem go igual memenig Uwait nug eiman gaul alaneu, gonugtal al emes wag darem usalareun. Go umkoskos gusig tapai daneu, go am saum banou maimai, ginampet macaneu sul tam, go umkoskos guzental dacaneu.

<sup>18</sup> Uwait nugtal gonugau dabeleu eiman, igual memenig usaleun. Gonugau petak ze eiman, ig ee ug amegai useg macaneu sul tapai migabun

migeun. Ece ipal unum go usalareun iguan zilacaranem.

*Ze suban doimai, salau man.*

<sup>19</sup> O izal zaiar, ag go suban abiu macan. Ag unum, dudu ipal agal ze suban doiban, ag pigai ze koli i awaran. Ag pigai i aiag sisilamau.

<sup>20</sup> Du in go pigai aigsisilaneu du, go Uwait nugau igul naliu i sesamoraneu.

<sup>21</sup> Gonun, wal igul mui, igul eg ipal macanemen go utan. Ag agtal agal wanimag banou uteiban, Uwait nug ze go agal oiagab oug mareun gusig patan. Ze gonug agal doropag imaraimai, kasarabun iboin.

<sup>22</sup> Ag Uwait nugau ze gaul i don. Ag ze doimai, 'Ig du naliu darem' aimai i poluman. Gonugau ze doiban, sesamoran.

<sup>23</sup> Einen, du in go Uwait nugau ze doimai, i sesamoraneu go du iror oimai, gonugau siameg pianeu sul.

<sup>24</sup> Go gonugau siameg iror ebu uligaimai, utei beteimai, gonugau siameg ein sul uligeun, go pigai dabug sikaneu.

<sup>25</sup> Bo, ig Uwait nugau kasai ze suban sesamoremun, igul eg nug go koli gusig i gumigamau. Gonun, duair in go kasai ze go sesamorabun umkoskos suban nanalaimai, go gaul doimai, i dabug sikaneu, go ze go sesamoraneu, gonun, Uwait nug gonugau igul uligaimai, gonugau salau macaneu naliu abu kalai muramau.

<sup>26</sup> Bo, du tub nug Yesus en ougab petak aimai, enaneu, 'Iz umkoskos zobu pianem' bo, du go gonugau ogusau suban i gumaneu, gonugau ogusau eiman ze gaul gaul macaneu. Du go gue

nugtal nug polumuraneu. Uwait nugau ameg ebu go zobu gaul pianeu.

<sup>27</sup> Bo, du in go Yesus en ougab petak aimai, igul naliu mui, aunagul mui, wab ailel uhu a mui, isanaraimai, em e ebuan igul eg i sesamoraneu, Uwait igual memenig du go gonugau ameg ebu gonugau ougab petak eun araog moroimai, go ze tamacag, go du naliu auramau.

## 2

*Duailel ecesab tamacag mui, duailel ecesab a mui suban gumaran.*

<sup>1</sup> O izal zaiar, ag Yesus Kristus, igual Dubanou Ban wanib banou mui, go en oigeb petak anemen duailel, ag dudu ecesab asiu a imaranemen sul, duailel ecesab tamacag han guzental imaran.

<sup>2</sup> Ag tatau ze go dabilan. Ziwas tub ebu, du tub go tibur galau awau arugaimai, iweiu naliu maimai, agal gotulanemen zaueim simau. Ziwas go ebutal, ecesab tamacag du tub, go iweiu naliu arugab tam han zaueim go simau.

<sup>3</sup> Du go iweiu naliu mui uligaimai, auramam, ‘Na empip naliu e ebu alai hoben’, bo ecesab tamacag du go auramam, ‘Na tapai damam’, ta ‘Na izal aramab alai hubamam’.

<sup>4</sup> Ag igul go guzenebi, go agal dabeleu eim dudu ipal agal igul sisiarai darem. Ag agal dabeleu eg eim sisiaranem dudu sul usalaimai, ag dudu goagal igul i suban sisiaranemen.

<sup>5</sup> O izal zaiar, ag go don, Uwait nug em e ebuan duailel ece tamacag agal oiagab petak gusig mabun tapai maraimai, gonugau gumaneu uzan siabun baib mareun. Uwait nug duailel unum ag

go en oiagab nug noumemen mui ereg baib go mareun.

<sup>6</sup> Bo, ag go duailel ecesab tamacag semaramen. Ag go don, duailel ecesab tamacag agen igul eg ag ibalagab i maranem. Dudu go ag ecesab asiu mui agen petak ag eg maraimai, sisiarabun dudu waiagab imarai bitanem.

<sup>7</sup> Petak, dudu goagen agal Dubanou Ban nugau wanib naliu ebu ze biabial kuai muranem.

<sup>8</sup> Uwait nugau agau ebu, igual Uwait Ban nugau kasai ze guzenai aigeu,

‘Na nag en ounab nug noumanem sul, duailel ipal en han guzental ounab nug noumamam.’

*Wok Pris 19:18*

Ag kasai ze naliupet pet go suban sesamoraimai, ag igul naliu guzenanem.

<sup>9</sup> Bo, ag du tub suban isanoroimai, du tub semuramen, go ag igul eg memen. Kasai ze gonug ag kasai ze i sesamoranemen dudu abai mareu.

<sup>10</sup> Ze e petak, einen, du tub go kasai ze unum sesamoraimai, tub ginampet i sesamoramaau Uwait nugau ameg ebu du go gue kasai ze unum etuboroun.

<sup>11</sup> Einen, ig abiu, Uwait nug guzenai aigeun, ‘Ag, dudu ailel a, wal igul i macan.’ ‘Ag du tub webi, i noumamaau.’ *Kisim Bek 20:13-14*

Na, du air a, wal igul i mem, bo, na du tub weben, noumamaau, go na Uwait nugau kasai ze unum etuborom.

<sup>12</sup> Uwait nugau kasai ze nug ig du tub nugau salau duailel i damam eu. Kasai ze go naliu gonugtal Uwait nug igual igul eg sisicigamaau. Gonun, ag umkoskos kasai ze gonugau piu daimai, ze maiban, agal salau macan.

**13** Du in go gonugau zaugul en i bisomag pimau, aiu ses Uwait nug ig sisicigabun ziwas ebu, go i bisou pimau. Bo, du in dudu ipal en bisomag piaramau, go Uwait nug sisiarabun ziwas ebu, isanaramau.

*Yesus en ougab petak eun du gonugau salau.*

**14** O izal zaiar, du tub gonugau ougab Yesus en petak eun du nug enaneu, “Izal oiab Kristus en petak em.” Guzenai ze maimai, go dudu ipal i isanaraneu, go gonugau ougab petak eun nug, Uwait waugab i imai simau.

**15-16** Bo, duair tub go tibur galau eg mui ta, ee tamacag darena, ag ula ebu du tub nug go auramau, “Nait ounab selai damau, na betemai, nait tibur galau maib, ee betei zen,” ze go nug go erunai isanaramau? Agenag go tibur galau moroimai, unab taiabun ee moron.

**17** Oiagab petak abun igul guzeneneg. Agal oiagab petak emen duailel ipal isanarabun salau i macanemen, ag gaul darena, go oiagab petak emen go noumeun sul dareu.

**18** Du tub nug anamau, “Du tub go gonugau ougab petak aneu, du tub go igul naliu macaneu.” Bo, du tub gonugau ougab petak aimai, duailel ecesab tamacag ipal isanarab tam, iz gonugau ougab Yesus en petak eun erunai abe mai? Izal igul naliu sil izal oiab petak emin abai maraba, pimam.

**19** Na Uwait tutak dareu abiu ta? Na guzenanem, go naliu. Bo, ag go don, wes eg han Uwait tutak dareu abiu maimai, banban uminaimai, esi-lakanem.

**20** Ag kar wageun dudu, ag Yesus en agal oiagab petak aimai, dudu ipal i isanaranemen, gonug agal oiagab naliu usalai mamau ta? Iz agal dabeleu eg ag abai marai.

**21** Getal igual embigeg Abraham nug gonugau nag Aisak egun aganemen biz ebu gabuai maimai, Uwait murabun guzeneun. Ziwas go ebu, Uwait nug Abraham gonugau ameg ebu naliu dareu aimai aneun.

**22** Ag go abiu ta? Abraham go Uwait en gaul ougab petak ab tam. Go Uwait en ougab petak aimai, salau meun, gonun, Uwait nug go du naliu eun.

**23** Guzenina, Uwait nugau ze getal aneun petak usaleun. Ze go guzenai aneun,

“Abraham go Uwait en gonugau ougab petak eun, gonun, Uwait nug go du naliu aureun.” *Stat 15:6*

Igul go en, go Uwait nugau baibiag emen.

**24** Guzenai, gonun, ag go abe macan, ig tutak oigeb petak aimai, salau mab tam, go en Uwait nug ig du naliu i aigamau. Du in go Yesus en ougab petak aimai, salau mamau, du go Uwait nug naliu auramau.

**25** Rahap go abu ulacan air go han guzental guzeneun. Zosua nug Israel du aliag Zeriko ban uzan bai abarabun palautarena, sina, gonug wagemaraimai, abu tub eiman koli palautarena betemen, gonun, Uwait nug go gonugau ameg ebu air naliu aureun. *Josua 2:1-21*

**26** Du tub nugau enib gonugau dorog waneun go ig abiu go enib noumeun dareu. Guzenaital, du in go Yesus en gonugau ougab petak eun salau mab

tam, du go nugau ougab petak eun noumeun sul dareu.

## 3

### *Igual minomig suban gumab.*

<sup>1</sup> O zaiar, ag abiu, ig Uwait nugau ze abai maranem dudu Uwait nug ig igul gusig mui sisicigamau, duailel ipal iau iau sisiaramau, gonun, ag Uwait nugau ze abai marabun dudu ag ula asiu i usalamam.

<sup>2</sup> Ig unum dabeleu eg zuna, igul eg manem, bo, du tub gonugau minob nug ze eg tub i macaneu, du go naliupet pet. Go nugtal gonugau enib suban gumabun iboin.

<sup>3</sup> Ig egun *hos* nugau ogusau ebu gugeg ginampet maimai, gugeg go keuina, *hos* eru eiman aidabun igual dabeleu sesamoraimai, unaneu.

<sup>4</sup> Tebil en han dabilan. Tebil go banou pet wol gusig nug patena, unaneu, bo, tebil nugau gugeg ginampet kekulina, tebil banou go du nugau dabeleu sesamorai unaneu.

<sup>5</sup> Igual minomig han guzeneneg, minomig go ginampet. Bo, go minomig gonug banban sik-sikaimai, gonugau wanib ulagwag macaneu. Ag go dabilan, ab waneb ginampet nug eleimai, gaian ecesab unum elaneu.

<sup>6</sup> Ag go don, igual minomig go ab waneb sul, igul eg nug em e gumaneu sul minomig nug igual enimig unum gumaneu. Minomig go sil ig igul eg asiu manem. Minomig ab zabeg elaneu sul. Ab bigeg go ob banou oug elaneu eiman zoun.

<sup>7</sup> Em e ebuan egun, meg, man mui, ecesab ipal ibut ze oug getal zag danemen, ulis dudu agen unum imaraimai, suban gumaranem.

<sup>8</sup> Bo, du tub nug gonugau minob suban gumabun sul iborain tam, tam pet tam. Igual minomig i imaneu, umkoskos ze biabial kuai macaneu. Go munug ze eg duailel wagaraneu sul, igual minomig ebu kapai dareu.

<sup>9</sup> Igual minomig nug Uwait Ban, igual memenig, nugau wanib ulagwag muranem. Bo, minomig gonugtal duailel ipal Uwait nugtal nug sul usalareun eg marabun sinocaranem.

<sup>10</sup> Minomig gonug Dubanou Ban nugau wanib wag muranem, minomig gonugtal duailel ipal eg marabun sinocaranem. O izal zaiar, go igul guzenanem, go naliu tam, go egonou pet.

<sup>11</sup> Ze naliu zanemun mui, ibut ze mui, em biag tutak eiman ereg i zuaneu.

<sup>12</sup> O izal zaiar, gaien zabub ebuan kopi dab useg mamau ta? Tam pet tam. Kolital kopi ebuan useg mamau gaien dab wabun iborain tam. Guzenaital, ibut ze eiman ze naliu zanemun zuabun iborain tam.

### *Dabeleu naliu mui, dabeleu eg mui.*

<sup>13</sup> Ag ula du tub dabeleu naliu mui dareu ta? Du go gue dabeleu naliu mui gonugau suban hobo dabun igul dudu ipal abai maramau. Go gonugau wanib banou wag i mamau. Go dabeleu naliu sesamorina, dudu ag gonugau igul naliu pimamen.

<sup>14</sup> Bo, ag dudu ipal agal wanimag banou mui wabun en oiagab eg maraba, ag agal wanimag banou mabun salau i macan. Agen

'Ig dabeleu naliu mui' aimai i ze macan. Ag igul go guzenaimai, polumaimai, petak ze naliu wagemanemen.

<sup>15</sup> Dabeleu go, Mesgai wageiman i aleu. Go em e ebuan wes eg nugau dabeleu eiman zoun.

<sup>16</sup> Dudu ag dudu ipal agal wanimag banou mui wabun en oiagab eg wina, ag agal wanimag wag mabun abu itananemen. Dudu go iau i dacamen, ag igul eg sag guzenanemen.

<sup>17</sup> Bo, dabeleu Uwait eiman alaneu, go naliupet pet. Ag dabeleu naliu sag sesamoranem. Duailel ipal abai iau daimai, dudu ipal en dabeleimai, agal ze suban sesamoranem. Dudu ipal en bisomag piaraimai, umkoskos isanaranem. Ag duailel naliu mui, duailel eg mui unum isanaranemen. Ag igul naliu sesamorabun i polumanemen. Ein igul guzenabun ze manem petak sesamoranem.

<sup>18</sup> Ag oiagab iau selai mui darena, igul go oiagab iau mui eiman, igul naliu guzenanem. Igul go naliu ee ug ougem bina, walu zuaneu sul, zumau.

## 4

*Kristen duailel ag Uwait sag sesamoran.*

<sup>1</sup> Agzozou einen ze alalaimai, alalanemen? Wanimag wag mabun igul eg go agal oiagab oug darena, agzozou alalanemen.

<sup>2</sup> Ag ecesab wabun oiagab alaneu, ecesab go wabun iborain tam, guzenaimai, ag dudu ipal agal ecesab wabun ag wagarina, noumabun guzenanemen. Ag ecesab wabun gusig dabilanem, bo, i wanemen, guzenaimai, ag aiag sisilina, ze alalaimai, alalanemen. Uwait nug ag

ecesab marabun en i auranemen, go gonugun ag ecesab i wanemen.

<sup>3</sup> Ag agal enimag en tutak dabeleimai, ecesab wabun Uwait auranemen. Ag dabeleu eg beu beu, gonun, ag Uwait ein ecesab wabun aurina, gonug ag ecesab go i maraneu.

<sup>4</sup> Ag Uwait en oiagab petak en ze macanemen, bo, ag go dual i suban dacanemen. Ag abiu, duair in go em e ebuan ecesab en ougab nug noumaneu go Uwait nugau iwai zaug. Gonun, duair in go nugtal em e ebuan ecesab en ougab nug noumabun tapai macaneu go nugtal Uwait nugau iwai zaug usalamau.

<sup>5</sup> Uwait nugau ze nug eneu, “Uwait nugau Ah Wes, Uwait nugtal igual oigeb oug migeun ig Uwait sag oiageb nug noumabun aiganeu.” Agal dabeleu ze go bigeg tamacag ta?

<sup>6</sup> Bo, Uwait nug gonugau ougab naliu eiman isanigeun. Go igul en, Uwait nugau ze nug eneu, “Uwait nug duailel agtal agal wanimag wag macanemen oi hicaraneu. Bo, duailel agal wanimag i wag macanemen Uwait nug gonugau ougab naliu eiman ag isanara-neu.” *Sindaun 3:34*

<sup>7</sup> Gonun, ag Uwait nugau piu daimai, gonugau ze sag sesamoreiban, Satan dual alalan. Ag guzenebi, go uminaraimai unamau.

<sup>8</sup> Ag Uwait nug waugab betebi, gonug koli ag waiagab alamau. Ag igul eg macanemen dudu, agal igul eg utan. Ag dudu dabeleu aliag mui, ag go dabeleu eg agal oiagab oug dareu han oi haran.

<sup>9</sup> Ag agal igul eg en oiagab eg waba, banban manilman. Ag siksikanemen dudu ag go uteiban, bisomagar sul dan. Ag wel anemen dudu, wel anemen uteiban, manilman.

<sup>10</sup> Ag Uwait nugau ameg ebu agal wanimag wag i macan, gonug agal wanimag wag maramau.

*Nait zaun en polu ze i men.*

<sup>11</sup> O zaiar, ag agal zaiagar agal enimag ebu ze eg i macan. Du in go zaug enib ebu ze eg macaneu ta, gonugau igul sisai muraneu ta, go du go kasai ze ebu ze eg maimai, kasai ze sisai muraneu. Na igul go guzenanem, go na kasai ze go i sesamoranem, na kasai ze sisai muranem du sul darem.

<sup>12</sup> Uwait nugtal kasai ze go araog meun, gonun, nug sag duailel agal igul sisiarabun go iboin. Nugtal duailel ipal imaraimai, ipal eg marabun go iboin. Gonun, na du eruneneg, gonun, zaun nugau igul sisai morom?

*Ig ein igul aiu ses zumaun i abiu, gonun, ag ein salau mabun ze gusig i macan.*

<sup>13</sup> Zaiar, ag ulis izal ze awaramoroi, go don. Ag guzenai ze macanemen, “Iz ulis ta, tuaba ta, ban uzan tub beteimai, wai tutak uteimai, iz go ebu aiwag salau maimai, aiwag asiu oi danai.”

<sup>14</sup> Ag einen guzenai ze macanemen? Ag tuaba erunamau go ag i abiu. Agal doropag erunai damau? Ag pi sul zoimai usalaimai, koli pigai tamaneu.

<sup>15</sup> Bo, ag guzenai ze macan, “Go Uwait nugau dabeleu aba, ig awau daimai, salau e murab ta, ulibe salau mab.”

<sup>16</sup> Bo, ulis, ag ein salau mabun wanimag wag macanemen, ag go igul egonou pet guzenanemen.

<sup>17</sup> Ag go don, duair in go igul naliu mabun abe meun, bo, go i macaneun, duair go gue igul eg macaneu.

## 5

*Zems nug dudu ecesab asiu mui gusig ze awareun.*

<sup>1</sup> Ag ecesab asiu a dudu, go don. Oiagab eg waba, banban manilman, einen, uhu banou ag ibalagab alamau.

<sup>2</sup> Agal ecesab unum eg waimai, tamamam. Agal arugabun iweiu naliu umum agen tugei zimam.

<sup>3</sup> Agal aiwag gol, silva mui tus zaneu sul eg umam. Go agal igul eg macanemen araog maraba, ag ab sul elaramau, einen, ag em e tamabun ziwas waugab ecesab asiu gotulai memen.

<sup>4</sup> Ag go don, salau dudu agen agal ougem salau oi maremenin, bo, agen koli salau dudu go ag aiwag marab tam, gonun, Uwait nug ag koli eg marabun ze mai darem. Bo, ag go dudu agal ze doimai, gau marab tam. Salau dudu go Weinemen, Uwait gusig mui gonug goagal Weinemen doun.

<sup>5</sup> Ziwas go ebu, ag em e ebu ecesab naliu asiu oimai, sikskai daremen. Dudu ag egun wai zabun ag amegai ee asiu morona, ban mina wai zanem sul, ag han sisiarabun ziwas waugab ebu, ecesab asiu gotulai daremen.

<sup>6</sup> Dudu igul naliu mui agen ag eg marab tam, bo, agen ze gusig awaraimai, wagarina, noumemen.

*Ig gusig tapai daimai, uhu oimai, Yesus gumei dab.*

**7** O zaiar, guzenaimai, ag agal oiagab iau selai daiban, igual Dubanou Ban, Yesus Kristus koli alamau gumei dan. Ag abiu, wai atag du, go gonugau wai oug ee ug naliu zuabun pei daneu. Go ougab iau selai mui ze nuna, gonugau wai ebuan ee ug walu zuabun gumei daneu.

**8** Go igul guzenaneu sul, ag han oiagab iau selai daiban, gusig tapai dan, einen, igual Dubanou Ban nug koli alamau ziwas pulig i dareu.

**9** O zaiar, ag agal zaiagar abai i wanin macan. Ag guzenebi, Uwait nug agal igul sisiaramau. Sisiarabun du go zau og tapai dareu.

**10** Zaiar, getal Uwait Ban nugau ze doimai, aidanemen dudu ag Uwait nugau ze duailel marai aidanemen dabilan, agal iwai zaiagar agen eg maremenin, bo, ag oiagab selai mui, gusig maraimai, uhu omenin. Ag igul go guzenemen sul guzenan.

**11** Ig abiu ag uhu banou oimai, agal oiagab Ban en utab tam, ag siksikamamen. Ag getal Zop nugau ze domenin. Go ougab iau mui uhu asiu oun, bo, ag abiu, Uwait Ban nug go en ougab egwina, suban isanoroun. Uwait Ban go bisomig peimai, ig en ougab nug noumaneu.

**12** O zaiar, ze e amegai dareu, agal ze ipal gusig mabun Mesgai wag ta, em e ebu ta, ecesab ipal wanib pataimai, agal ze i gusig macan. Bo, ag “Tam” aiban, go iboi. Ag “Io” aiban, go iboi. Guzenebi, Uwait nug ag sisiaraimai, ag ze a daremen aimai, i awaramau.

*Ag oiagab petak mui Uwait auran.*

<sup>13</sup> Ag ula du tub uhu mui ta? Du go gue Uwait auramau. Du tub go ougab siksikai mui dareu ta? Du go gue kabal waimai, Uwait nugau wanib wag muramau.

<sup>14</sup> Bo, ag ula du tub go ebeu mui daba, go du go agal zobu piabun gumaraneu dudu banban awarebi, gonugau ebeu en Uwait auramam. Ag Dubanou Ban nugau wanib pataimai, a ilau gonugau gagalig wag ebu esikamam.

<sup>15</sup> Ag oiagab petak aimai, Uwait aurebi, Dubanou Ban nug du go kasuraba, naliu usalamau. Bo, go du go igul eg meun aba, Dubanou Ban nug gonugau igul eg zilagai muramau.

<sup>16</sup> Uwait nug agal igul eg zilaganeu, gonun, ag tutak tutak agal zaiagar ibalagab igul eg memenin unum awarebi, agzozou Uwait ereg aurebi, agal igul eg zilagai maramamen, kasaraba, ag naliu usalamamen. Du in go Uwait nugau ze sesamoraneu du gonugau ze auraneu gusig mui, gonun, Uwait nug gonugau auraneu ze sesamoramau.

<sup>17</sup> Elaiza go igua du sul, gonug em e ebu ze i nuabun aimai, Uwait gusig aurai darena, Uwait nug wai ainarai mui geil wasolig mui ereg ze patena, ze nuab tam.

<sup>18</sup> Guzenina, go koli Uwait aurai darena, emes wag eiman ze noimai, ee ug koli walu zoun.

*Zaicig tub abu tuguihai i sesamoramau agen imai aimai, abu suban abai muramamen.*

<sup>19-20</sup> O izal zaiar, zaicig tub ag ula go petak ze sesamorab utaba, du tub nug abu naliu koli abai morona, go du go abe muramau, du inug du igul eg macaneun tub koli Uwait waugab imai alamau,

igul eg macaneun du gonugau dorog noumeun  
ebuan koli imaiceun. Igul go eiman, Uwait nug  
gonugau igul eg asiu macaneun zilagai muramau.

**Uwait nugau Ze Naliu  
The New Testament in the Kein Language of Papua  
New Guinea  
Nupela Testamen long tokples Kein long Niugini**

copyright © 2005 Wycliffe Bible Translators, Inc.

Language: Kein

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2012-01-13

---

PDF generated using Haiola and XeLaTeX on 18 Apr 2025 from source files  
dated 31 Aug 2023

7c8d8e69-f9a1-5ddf-9698-e3ef19204c55